

## **Sikûn Tesarõn** **Pawre kot Tesarõn kamã Jejus kôt** **kwÿjê hwÿr wam kagà nẽ mẽn̄h kôt** **hõ kagà nẽ mẽn̄h**

Pawre na pre kagàja nhĩpêx nẽ ma Tesarõn kamã Jejus kôt hkwÿjê hwÿr kumẽ. Na pre hte Tesarõn kamã mẽ kãm Jejus ã mẽ hkurê xwÿnhjaja Jejus ã tanhmã mẽ homnuj to nhũm mẽ amnhĩ xà htÿx kamã hamak o pa. Hãmri nhũm Pawre mẽ harẽnh ma nẽ kagàja nhĩpêx nẽ mẽ hwÿr kumẽ. Nẽ kamã mẽ kãm mẽ hamaxpêr o hihtÿx. Nẽ mẽ kot arĩ Tĩrtũm kôt amnhĩ nhĩpêx mex o pa nẽ hamaxpêr kôt hamaxpêr o pa hã mẽ kãm karõ. Nẽ nhÿrmã Jejus akupÿn kaxkwa rũm mẽ pahpê hkrajê hwÿr wrÿk nẽ pika ho hapêx par ã mẽ kãm harẽ. ã na pre Pawre mẽ kãm kagàja kamã mẽ kãm ujarẽnh anẽ. Nẽ mẽ kãm:

<sup>1</sup> Pa Tesarõn nhõ xwÿnh kot Tĩrtũm kapêr mar kaxyw axpên wÿr mẽ apikuprõnh xwÿnhjaja? Xà mẽ amex na ka mẽ apa? Ixpê Pawre na pa axte mẽ awÿr kagà nhĩpêx nẽ kumẽ. Siras mẽ Ximotre mẽ pa mẽ awÿr kumẽ. Nà mẽ pahpê Mẽpanhĩpêêxà maati Tĩrtũm mẽ Kra Jejus Kris kwÿ na pu mẽ.

<sup>2</sup> Jakamã na pa htem mẽ ato wa hwÿr rãhã ho ri ixpa. Wa kot mẽ akutã nojarêt rãhã ka mẽ ajamakêtkati nẽ apa kaxyw. Nẽ mẽmoj to mẽ akutã wa nojarêt rãhã ho pa kaxyw.

*Tīrtūm kot nhỹrmã hkrajê nhĩpêx kati xwỳnhjê  
homnuj tỳx ã harẽnh*

*Wam Pêtre 4.12-19*

<sup>3</sup> Nê na ka htem amnhĩ kaxyw Tīrtūm mã aja-maxpêr tỳx mex o ri apa. Nê axpên kutã anojarêt rãhã nê. Na pa htem ã mẽ ate amnhĩ nhĩpêx anhỹrja mã ijamaxpêr nê mẽ anhỹ hã ixkĩnh nê Tīrtūm mã mẽ anhỹ hã ixkĩnh ã amnhĩ jarê. <sup>4</sup> Nê nhỹhỹm ixpa nê nhỹri krĩm agjê nê kamã Tīrtūm kôt mẽ pahkwỳjê mã mẽ ato amỹra nê mẽ kãm:

—E pa mẽ amã Tesarōn kamã Kris kwỳjê jarê ka mẽ inhma. Nà mẽ õ krĩ kamã mẽ hkwyjaja na htem Kris ã mẽ hipêx kati ho pa nhũm htem amnhĩ xà htỳx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkôt amnhĩ nhĩpêx mex rãhã ho pa. Anê.

<sup>5</sup> ã mẽ ate mẽ kutã amnhĩ nhĩpêx anhỹr o apaja na hte Tīrtūm hã mẽ apumu nê hkĩnh nê pa. Nê mẽ akukamã hamaxpêr o:

—Mê kot Ixkra Jejus ã tanhmã mẽ hipêx to ho pa htã ãm hãmri na htem mẽ kutã amnhĩ to htỳx o pa nê mẽ umaj wa ixkaga hkêt nê. Na htem ã amnhĩ nhĩpêx anê nê mẽ kêp ixkra hã amnhĩ to amnhĩrĩt mex nê. Nà koja mẽ nhỹrmã wa ixri mex kumrêx nê htĩr tũm nê pa ho pa.

Anhỹr o hamaxpêr. <sup>6</sup> Nê mẽ kot Kris ã mẽ anhĩpêx punuj xwỳnhjaja koja Tīrtūm nhỹrmã mẽ atã mẽ homnuj tỳx nê nhũm mẽ amnhĩ xà htỳx kamã hamak rãhã ho pa. ãm hãmri koja ã mẽ atã mẽ hipêx anê. <sup>7-10</sup> Koja Pahihti Jejusja nhỹrmã man akupỹn pika hwỳr hirã htỳx kãm wrỳ nhũm Tīrtūm kapêr o mẽ wrỳk xwỳnh xihtỳx xwỳnhjaja man hkôt wrỳ. Koja mẽ wrỳ hãmri nê mẽ kot

amnhĩ tomnuj xwỳnhjê homnuj tỳx kumrêx. Jao ma mẽ kot amnhĩ xà htỳx kamã hamak tũm xàta wỳr mẽ rēnh pa nhũm mẽ kamã htĩr tũm nē amnhĩ xà htỳx kamã hamak rāhā ho pa ho pa. Koja ā Pahihtija amnhĩ nē mẽ kot hkôt amnhĩ xunhwỳr kêt xwỳnhjê rēnh anē nhũm mẽ pahkĩnhā Tĩrtũm mẽ Krata wa kuri mex nē pa hkêt nē. Nē mẽ pahkĩnh ā wa mex o wa mex nē wa hihtỳx o wa hihtỳx ā wa omunh kêt nē. Koja Pahihti Jejus nhỹrmã akupỹn wrỳ nē ā mẽ panē mẽ hipêx anē. Koja wrỳ pu mẽ amnhĩ kaxyw hkôt pajamaxpêr xwỳnhjaja amnhĩ wỳr omu nē pahkĩnh nē. Hāmri nē amnhĩ nhĩ nyw ā amnhĩ pumu nē kām:

—Hêxta waa nē. Amex o amex Pahihti. Na ka pre mẽ inhnē ty hāmri nē mẽ inhmā mẽ inhĩ nyw gō. Kot paj mẽ Tĩrtũm mẽ war ari inhmex kumrêx nē ixtĩr tũm nē ixpa ho ixpa. Ām hāmri na ka ā mẽ ixto mex anē. Nà amex kumrêx o amex kumrêx Pahihti. Anē.

Ā kot puj mẽ pahpê hkwỳjaja amnhĩ tã kām mex o mex ā harēnh anē. Ra mẽ ate mẽ ixkapêr mar nē hkôt amnhĩ xunhwỳr jakamã kot kaj mẽ ixpyrà nē ā kām mex o mex ā harēnh anē.

*Pawre kot Tesarõn nhõ xwỳnhjê ho Tĩrtũm wỳr ā harēnh*

<sup>11-12</sup> Nē na pa htem mẽ ato Tĩrtũm wỳr rāhā ho ixpa nē kām:

—Pa Tĩrtũm? E Tesarõn kām akrajaja na pa mẽ ho awỳ. Na ka hte Akra Pahihti Jejus Kris mẽ wa mẽ ho mex rax o apa. Jao amnhĩm mẽ arē nhũm mẽ ra kām amnhĩ to mex prām nē. Na htem amnhĩ kaxyw Jejus mã hamaxpêr rāhā pē mẽmoj to axpēn kutã nojarêt o pa. Jakamã kwa tanhmã mẽ hkrã

hto kê mẽ akôt ã amnhĩ nhĩpêx anhỹr rãhã ho pa. Kêr ka mẽ kot akôt amnhĩ nhĩpêx o pa hã mẽ omu nẽ akĩnh nẽ mẽ kãm mẽ mex ã mẽ harẽ. Nhũm mẽ ate tanhmã mẽ ho mex to hã amnhĩ tã apumu hãmri nẽ mẽ amnhĩ pyrã nẽ amã amex o amex ã ajarẽnh rãhã ho pa. Anẽ.

## 2

*Kot amnhĩ tomnuj tỳx kumrêx xwỳnh maati jarẽnh*

*Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18*

<sup>1</sup> Nẽ koja nhỹrmã mẽ panhõ Pahihti Jejus Kris akupỹn wrỳ pu mẽ ma kutã api nẽ kakrã kamã hkaxpa. Jakamã kwa Jejus kôt ixkwỳjaja. <sup>2</sup> Koja mẽhõ mẽ awỳr mỗ nẽ mẽ amã Jejus ra akupỹn wrỳk ã harẽnh japêr. Rỳ tanhmã mẽ amã Jejus hpôx xà hã arĩgro jarẽnh o hêx to nẽ mẽ amã:

—Kwa na ra Jejus akupỹn nojarê. Koja tokyx akupỹn mẽ pahwỳr wrỳ. Semãn ja kamã rỳ ko. Apu hõ hã koja apu wrỳ rỳ ko.

Anhỹr o harẽ. Nẽ Tĩrtũm Karõ nhỹ hã ã kot mẽ amã harẽnh anhỹr ã amnhĩ jarẽ rỳ nhãm mẽhõ kot ã kãm harẽnh anhỹr ã harẽ. Rỳ pa ixte harẽnh nẽ hã kagà hã ijarẽ. Nom kwa kêr ka mẽ kapêr ma nẽ ãm ama nẽ hkôt ajamaxpêr kêt nẽ. Rỳ ama nẽ tee ri amnhĩ kukamã ajamaxpêr kêt nẽ. Koja mẽhõ ã mẽ amã Jejus tokyx wrỳk ã harẽnh anẽ nẽ ãm amnhĩ krã hkôt ã harẽnh anhỹr o hêx. Nom Tĩrtũm Karõ nhỹ hã rỳ pa inhỹ hã rỳ nhãm Kris kôt mẽ panhiõ nhỹ hã ã harẽnh anhỹr kêt nẽ. <sup>3-4</sup> Jakamã kêr ka mẽ ãm mẽ kot harẽnh o hêxja ma nẽ hkôt ajamaxpêr kêt nẽ. Kormã Pahihti Jejusja akupỹn

nojarêť kêt. E kot paj ixprĩ hã mẽ amã ja jarẽ ka mẽ inhma. Nà kormã Pahihti akupÿn nojarêť kêt ri koja mẽ ohtô rax kumrẽx nẽ Tĩrtũm kutã amnhĩ xunhwÿ nẽ kãm hkurê ho pa. Nẽ amnhĩ tomnuj tÿx o pa. Hãmri nhũm ra kot amnhĩ tomnuj tÿx kumrẽx xwÿnh maatija amnhĩ to amnhĩrĩť. Nom na pre ra Tĩrtũm tanhmã kot hipêx to hkukamã hã amnhĩ jarẽ. Koja xep gaa nẽ ma mẽ kot amnhĩ xà htÿx kamã hamak tũm xàta wÿr kumẽ nhũm kamã amnhĩ xà htÿx kamã hamak o pa rãhã nẽ pa ho pa.

Tã nom kormã Pahihtija akupÿn wrÿk nẽ ma hwÿr mẽnh kêt ri koja mẽ piitã omu nẽ kêp Mẽhpãm maati pixi hã harẽnh kaxyw mẽ kêp mẽ õ sãnti piitã hkrakrak pa. Nẽ mẽ kot mẽmo karõ ho amnhĩ pãm ã harẽnh xwÿnhja nhũm piitã hkrakrak pa. Hãmri nẽ axtem nẽ Tĩrtũm mã amnhĩ jarẽnh xà hã ixkre jatur xà kamã hitom wÿr axà nẽ kamã nhÿ nẽ hêx rom mẽ piitã mẽ kãm kêp Tĩrtũm ã amnhĩ to hêx nẽ mẽ kãm:

—E mẽ amnẽ ixpumu. Ixpê mẽ anhõ Tĩrtũm na pa. Pa kot kaj mẽ inhmã inhmex o inhmex ã ijarẽ. No kêr ka mẽ anhõ sãnti ho apãm o apa hkêt nẽ. Kwarĩ ho kwarĩ. ãm paxipix ixpê Mẽapãm maati nẽ paxipix ixpê mẽ anhõ Tĩrtũm.

Anhÿr o amnhĩ to hêx. <sup>5</sup> Na pa pre arĩ mẽ akôt ixpa ri ã mẽ amã harẽnh anẽ. Mãn arĩ mẽ ate ja hã anohtÿx rÿ ko. <sup>6</sup> Nom kormã ã kot amnhĩ nhĩpêx anhÿr xà hã arĩgrota kormã kator kêt. Mẽhõ kormã kot kêp àmnàr jakamã nhũm kormã kator kêt nẽ. Ra mẽ ate kêp àmnàr xwÿnhja jarẽnh mar. Tã koja hpôx xà hã arĩgro kato nhũm kêp àmnàr xwÿnhhta kãm pry kaprã nhũm rĩ kormã mõi. <sup>7</sup> Nom na hte ra hpimxur pê Tĩrtũm nẽ mẽ piitã mẽ hkurê ho pa.

Mē kot Tīrtŭm kŏt amnhĩ xunhwŷr pymaj tanhmã nē mē ho ho pa. Nom kormã kēp àmnàr xwŷnhja kēp àmnàr jakamã nhŭm hte mē noo mã tanhmã mē ho hkēt nē. Tã koja Tīrtŭm nhŷrmã kēp àmnàr xwŷnhja mã anē nhŭm kuma nē kãm ure nhŭm rĩ kormã amnhĩ to amnhĩrīt nē mē piitã mē noo mã mŏ nē Tīrtŭm nē tanhmã mē kãm hēx to ho pa. <sup>8-12</sup> Koja kato nē Satanasti mē wa mē piitã tanhmã mē nokupyr to ho ri mē hkŏt pa. Nē hēx rom mē kãm aa mē kot mēmoj pumunh kēt kwŷ ho anhŷr o ri pa. Koja wa hēx rom te Tīrtŭm kot amnhĩ nhĩpēx pyrāk o ã amnhĩ nhĩpēx anē. Hãmri nhŭm mē kot Jejus kŏt amnhĩ xunhwŷr kēt xwŷnhjaja ja hã wa omu nē wa hkŏt hamaxpēr kurē kumrēx. Nē àm hãmri wa kapēr ã wa hkamnhĩx. Kop apu ra mē kot Tīrtŭm kapēr mar nē hkŏt amnhĩ xunhwŷr ronhŷx ra Tīrtŭm amnhĩ tã mē omu nē mē ho hkra. Nom koja mē kãm kapēr mar prãm kēt nē. Àm wa kot amnhĩ to hēx o wa pa xwŷnhhta kŏt pix mã koja mē kãm amnhĩ nhĩpēx prãm.

Ja mŷrapē koja Tīrtŭm tee ri ja hã mē omu hãmri nē mē nē wa kot amnhĩ tomnuj tŷx xwŷnhhta wa omunh kēt nhŭm wa tanhmã mē kãm amnhĩ nhĩpēx to nhŭm mē wa omu nē wa hkŏt hamaxpēr kurē kumrēx. Hãmri nē wa gryk ã Tīrtŭm kaga jakamã nhŭm nhŷrmã mē kot amnhĩ xà htŷx kamã hamak tŭm xàja wŷr mē rēnh pa.

Koja Satanasti mē kot amnhĩ tomnuj tŷx kumrēx xwŷnh maatita ã hēx rom tanhmã mē no kupyr to anhŷr o pa rãhã nhŭm Pahiht Jejusja hirã rax kãm akupŷn mē pahwŷr wrŷ. Hãmri nē kot amnhĩ tomnuj tŷx kumrēx xwŷnh maatita ã amŷnē nhŭm mē kãm hpĩr kurē kumrēx nhŭm hapēx. Koja ã

amnhĩ nhĩpêx anê.

*Tĩrtũm kot tanhmã mẽ pahto mex to hã harênh  
Rõmãn 8.28-30; Wam Tesarõn 2.13, 5.23-24*

<sup>13</sup> Nê amnepêm kormã mẽmoj kêt ri na pre Tĩrtũm amnhĩm mẽ arê. Mẽ ate kapêr mar nê hkôt amnhĩ xunhwỳr nhũm kot mẽ ato hkra kaxyw mẽ arê. Kãm mẽ ajapêê. Na pre mẽ awỳr amnhĩ Karõ rê nhũm mẽ akarõ mã agjê nê tanhmã mẽ ajamxpêr to ka mẽ ỹ hã tãm amnhĩ nhĩpêx rãhã ho ri apa. Na pa htem ja hã mẽ amã ijamxpêr nê mẽ anhỹ hã ixkĩnh kãm Tĩrtũm mã mẽ ajarênh o ri ixpa. <sup>14</sup> Na pre mẽ awỳr mẽ ixrê. Mẽ ixte mẽ awỳr ixpa nê mẽ amã tanhmã Jesus kot mẽ panê amnhĩ nhĩpêx to hã harênh o ixpa kaxyw. Mẽ ate mẽ inhmar nê Jesus kôt amnhĩ xunhwỳr nhũm Tĩrtũm kot Pahihti Jesus Kris o mex pyrà nê tanhmã mẽ ato mex to kaxyw. <sup>15</sup> Jakamã kwa kêr ka mẽ ra mẽ ixte wam mẽ awỳr kagà mênhta kamã harê nê mar tỳx nê. Nê mẽ akôt mẽ ixpa ri tanhmã mẽ ixte mẽ ajahkre htoja mã ajamxpêr mex nê hã ano htỳx nê hkôt amnhĩ nhĩpêx rãhã ho ri apa. Jao Jesus kôt amnhĩ nhĩpêx mex o ri apa Kris kôt ixkwỳjaja.

<sup>16</sup> Mẽpanhĩpêêxà maati mẽ Pahihti Jesus Kris wa kãm mẽ pajapê htỳx kumrêx. Na hte wa tanhmã mẽ pajamxpêr o hihtỳx to ho pa pu mẽ wa ỹ hã tãm pajamxpêr o ri papa. Nê wa ỹ hã nhỹrmã wa kuri pamex nê pahĩr tũm nê papa hkukamã pajamxpêr kaprỳ ho papa hkêt nê. <sup>17</sup> Na pa htem mẽ ato wa hwỳr o ixpa nê wa kãm:

—Pa Tĩrtũm mẽ Jesus wa? Kwa kêr ka wa tanhmã Tesarõn kamã akrajê mã mẽ hamxpêr o hihtỳx

to kê mẽ war anhỹ hã tãm amnhĩ nhĩpêx nẽ tãm hamaxpêr. Jao kapêr mex rãhã nẽ pa ho pa. Anẽ.

### 3

*Tanhmã mẽ pahte axpên to Tĩrtũm wỳr to hã kot mẽ pamã karõ*

*Korosẽ 4.2-4*

<sup>1</sup> Nẽ kwa Kris kôt mẽ ixtõ nẽ ixtõxjaja. Kêr ka mẽ amnhĩ xwar mẽ ixto Tĩrtũm wỳr rãhã ho ri apa. Mẽ ixte krĩ piitã hkôt mẽ kãm Jejus jarênh o ri mẽ hkôt ixpa nhũm mẽ kot mẽ inhmar nẽ amnhĩ kaxyw Jejus kôt hamaxpêr kaxyw. Jao mẽ apyrà nẽ hkôt amnhĩ nhĩpêx mex o pa kaxyw. <sup>2</sup> Nom koja mẽ piitã ã amnhĩ nhĩpêx anhỹr kêt nẽ. Mẽ hkwỳjaja kãm Jejus jarênh mar prãm kêt jakamã kwa mẽ ixto Tĩrtũm wỳ kê mẽ inhnê mẽ omunh mex nẽ nhũm mẽ Jejus ã tanhmã mẽ ixto hkêt nẽ.

<sup>3</sup> Nẽ koja Pahihti tanhmã mẽ akrã hto ka mẽ ajamaxpêr mex nẽ ỹ hã hkôt amnhĩ xunhwỳr tỳx o ri apa. Jakamã nhũm Satanasti mẽ ate amnhĩ tomnuj hprãm xàj tee ri tanhmã mẽ anhĩpêx to kaprỳ nhũm Pahihti mẽ anê omunh mex nẽ. Ra kot mẽ atã amnhĩ jarênh xà hkôt. <sup>4</sup> Koja ã mẽ anê hipêx anẽ ka mẽ ỹ hã tanhmã mẽ ixte mẽmoj tã mẽ amã karõ xà hkôt amnhĩ nhĩpêx mex o ri apa. <sup>5</sup> Tã kê Pahihti tanhmã mẽ akrã hto ka mẽ Tĩrtũm pyrà nẽ mẽ piitã mẽ kamã axukaprĩ ho ri apa. Nẽ Pahihti Kris pyrà nẽ mẽmoj punuj kutã amnhĩ to htỳx nẽ. Jao hkôt amnhĩ nhĩpêx mex rãhã ho ri apa.

*Mẽ kãm kaga xwỳnhjê jarênh*

*Wam Korõt 4.12; Epes 4.28; Wam Tesarõn 4.9-12*



<sup>6</sup> E kot paj hpānhā Kris kōt mē pahkwỳ kām kaga xwỳnhjē jarē ka mē inhma. Pahihti Jejus nhỹ hā kot paj mē amā tanhmā mē harēnh to. Nà koja mē akwỳjaja kām kaga nē amnhīm mēmoj tā àpēnh kēt japēr. Nē mē ixte mē axàpēnh mex o apa hā mē amā karōja kuhpa hā amnhīm mēmoj tā àpēnh kēt japēr. Koja mē ã amnhĩ nhĩpēx anē ka mē ja hā mē omu hāmri nē mē hkōt ri apa hkēt nē. <sup>7-8</sup> Xà mē pajaja na pa prem ma mē awỳr mō nē mē akōt inhmā kaga nē mēmoj tā ixàpēnh kēt nē ri ixpa? Nà na pa prem mē apa kukwak ri ixàpkur pymaj ixàpēnh rūnh nē amnhĩ pa pix kukwak ri ixàpkur o ri ixpa. Na ka prem mē inhmā mēmo mē apkur xà ho mra pa prem amarĩ amnhīm hamỳnh nē hkur kēt nē. Na pa prem hpānhā mē amā amnhĩre nē kormā kuku. Tā kēr ka mē ã amnhĩ nhĩpēx anhỹr o ri axpēn kōt apa nē amnhĩ pa pix kukwak ri apku. Nē mē amā kaga hā nhām akwỳjē hpa kukwak ri axàpkur o ri apa kēt nē. <sup>9</sup> Na pa prem amnhĩ pa pix kukwak ri ixàpkur o ri mē akōt ixpa. Mē ate ja hā mē ixpumunh nē mē ixpyrà nē ã amnhĩ nhĩpēx anhỹr kaxyw. Nom mē ixte Jejus mā tanhmā mē ajahkre hto nhūm mē ate mē inhmar nē hpānhā mē inhmā mē ixàpkur xà nhōrja Jejus mā tanhmā kute hkēt tā pa prem ã amnhĩ nhĩpēx anhỹr kēt nē. Mē ate ja hā mē ixpumunh nē mē ixpyrà nē ã amnhĩ nhĩpēx anhỹr kaxyw na pa prem amnhĩ pa pix kukwak ri ixàpkur o ri mē akōt ixpa. <sup>10</sup> Na pa prem mē amā ja hā karō ho:

—Koja mēhō kām kaga nē àpēnh kēt nē ka mē ja hā omu nē kām ò hkēt nē. Kwār māmri apkur kēt nē kām prām nē ri pa nē amnhĩ pumu. Anē.

11 Tã xep ra mẽ akwỳjaja ã amnhĩ nhĩpêx anê nê kãm kaga nê àpênh kêt nê amarĩ ri pa. Nê xep htỳx ri axpên jakwa kamã nhãm mẽ hixi ho rêr o ri pa. 12 Kwa mẽ inhma Jejus kôt ixkwỳjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwỳnhjê jarê ka mẽ inhma nê mẽ inhmar tỳx nê. Kêr ka mẽ kãm kaga xwỳnhjê mã anê kê mẽ jam ure nê hpãnhã àpênh mex o pa. Jao mẽ apyrà nê amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anê.

13 Nê kwa kêr ka mẽ axpên to mex o apata kaga hkêt nê.

14 E na pa mẽ ã Tirtũm nhỹ hã mẽmoj tã mẽ amã karô nê hã kagà anê. Tã koja mēhō kamã harê nê kuma nê ãm kuma nê hkôt amnhĩ nhĩpêx kêt ka mẽ ja hã omu nê hkôt ri apa hkêt nê. Tokyx kot ja hã amnhĩ pumunh nê amnhĩ tã hpijaàm kaxyw. 15 Nom arĩ Kris kôt kêp mẽ akwỳ jakamã kêr ka mẽ arĩ kêp mẽ atō rỳ atōx ã tãm hipêx nê kãm akapêr mex o ri apa. Nom te ho kêp mẽ akwỳ hkêt pyrāk o kãm akapêr kêt nê.

*Tanhmã Pawre kot mẽ ho Jejus wỳr to hã harênh*

16-18 Nê na pa hte mẽ ato Pahihti Jejus wỳr rãhã ho ixpa. Kot mẽ pamã mẽ pajamakêtkati xà nhôr jakamã na pa htem mẽ ato kuwỳ nê kãm:

—Pa Pahihti? Kwa kêr ka Tesarôn kamã akwỳjê pumu nê mẽmoj to mẽ kutã anojarêr rãhã ho ri mẽ hkôt apa. Kê mẽ hamakêtkati nê àmnhĩx pa ho pa. Anê.

Tã ãm ja pix. Ixpê Pawre na pa kagà jatur xà kamã inhĩhkra ho amnhĩ nhĩxi nhĩpêx. Na hte kagà nhĩpêx xwỳnh inhmã ixkapêr ã kagà. Nê hã kagà

hpa pa hpãnhã hatur xà kamã pam inhĩxi nhĩpêx.  
Tã na hapêx.

**Tĩrtũm kapēr ã kagà nyw**  
**New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

**Copyright Information**

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 21 Feb 2024 from source files  
dated 29 Jan 2022

383a4e22-34cd-505f-9cc2-2f9921e7aa9f